

寇忠愍公詩集三卷

宋寇準撰

清康熙吳調元辨義堂刻本

傅增湘校並跋

一冊

寇忠愍公詩集序

金紫光祿大夫行尚書戶部侍郎知河陽軍州事上柱國范雍述
混茫之始判而異焉騰爲輕清降作重濁著之顯
者從其類矣是故三辰晶明委照萬寓風雲縹緲
周流八極附於天也培塿成垤因之原隰潢汙積
泆隨其窪窳從其地也其間萬物悉由稟焉若稟
之清者飛則爲鸞鳳鵬鷃走則爲騏驎駟駁茂則
爲芝蘭菹芷植則爲松桂筠篁引而伸之不可勝
數人爲物之靈也是以得乎輕清則爲賢爲聖為

明爲哲爲君仁而睿爲臣正而肅爲父慈而溫爲子恭而順發爲事業則惠愛同濟聰敏純慈形於文章則典切淵奧鴻博麗正斯蓋出乎異稟忠愍公所謂輕清之降靈焉其鍾體質也溫粹莊厲和氣襲物其立臣節也端亮平直英風可尚其施政教也寬簡明裕視民如傷其爲文章也優贍微婉屬意綿密尤工於詩曲盡風雅藻思宏逸峻格高遠因興發詠必根於理得騷人之旨趣焉故所成篇詠膾炙衆口傳寫寶秘恨不多得鴻筆與學靡

不欽嘆故樞相文康即公之壻實有道之士焉志公之墓序初知巴東曰詩家者流目爲冠巴東以方前代羅江東趙渭南也錄公警策之篇若遠水無人渡孤舟盡日橫到海只十里過山應萬重此詩二全等句又謂公之爲詩必本風騷之旨而以感傷為主嘗爲江南春二絕其一曰波渺渺柳依依孤村芳草遠斜日杏花飛江南春盡離腸斷蘋滿汀洲人未歸其二曰杳杳烟波隔千里白蘋香散東風起日落汀洲一望時愁情不斷如春水人曰

少貴無不足者其摠詞綺靡可也氣焰可也惟不當舍悽爾今而思之迺莫年遷謫流落不歸之意詩人感物固非偶然時以為文康公之知言也大約公之為詩多有此意又如聞杜宇云曾為深冤無處雪長年江上哭青春平林雨歇殘陽后愁殺天涯去國人此非先詠南行之事乎公平昔酷愛王右丞韋蘇州詩吟詠斯則過矣雍項為公倅常從遊讌多聞其得意之句情思閑雅聽之忘倦隨錄簡牘才數十篇今守三城會監軍趙侯臨即公

之中表也日與遊接時道公詩因請於公家盡錄昔所存紀得二百餘篇并前之所錄不在此數者及謫官後趙公所記共二百四十首類而第之分為上中下三卷其餘流落無復求購懼歲久磨滅因序以成編此第言公之詩也若大節賢行則有追謚詔旨存焉亦錄於集首俾開卷者不獨仰騷雅之道爾

冠忠愍公詩集序

萊公兩朝大臣勲業之盛掀天揭地人皆知有其名而往往或不知有其詩何也蓋勲業有以揜之也伊尹之訓周公之誥著在方冊表裏典謨而自古及今論文者必曰孔孟而不曰伊周蓋伊周之可稱在於興商輔周訓誥之作不足道也公清才雅韻冠絕一世播於篇什平淡淳正得風雅之體自其少年從仕以至立朝退處歡愉逸樂激烈憤惋無不並見於詩太原范伯純始收錄篇什分爲

三卷春陵得之尤其後也蓋公晚年遷謫嘗至春陵邦人思慕不忘由是建樓畫像以崇朝夕然而詩篇之傳家百不一焉逮宣和間王公次翁來茲曳組景仰前脩因取舊集刊版以傳士夫鼓舞以相夸詫而春陵景物由是增輝矣近時楊守惺亦即舊板重加刊治至此未幾而字之漫滅者復且過半數適茲承乏政事之餘取而閱之深恐浸以失真復命校正鳩工一新焉昔白居易謂劉禹錫之詩在處應有神物護持禹錫一文人徒以句韻

之工識者竒之尚且如此况公文章所在當如何哉吾又知自有不可得而漫滅者存焉爾隆興改元七月 日長樂辛敷書

寇忠愍公詩集序

道州介乎湖南廣西之兩間江山迴合秀潤所鍾
風俗淳厚其民尊賢樂善為兩路甲自昔聞人如
陽亢宗元次山呂溫薛伯高等相繼為州刺史邦
人榮之經數百年至今祠事不忘也次山嘗節度
荆南又經畧容管等八州矣然世必曰元道州而
獨道州祠堂在焉丞相萊國公以元勲大德歷事
太宗
真宗二帝膏澤滲漉衣被天下方其盛時出入將

相雄藩鉅鎮分閫授節濟民利物隨在周治治暮莫年
遷謫始至道州其在道州也躊躇退縮卷而藏之
固無向時之施設也然百餘年間求其遺跡而諸
鎮之客館皆丘墟矣唯道州有寇公樓尚繪公像
事之豈非尊賢樂善之俗然乎宣和壬寅次翁受
命假守既至拜公像凜凜若見其人方且朝夕磨
勵取公師法施之郡政顧樓久不葺迺命工易椽
桷之腐朽者完甃砌之頽闕者飾堊釐之漫漶者
既煥然一新矣又得公詩三卷凡二百四十篇為

校正其訛錯鏤板傳久且公之事業焜耀竹帛與
日月爭光非待詩而後傳也蓋以慰邦人無窮之
思而么麼趨趨亦庶幾託公詩以不朽乎宣和五
年十二月朔濟南王次翁序

贈謚誥

知制誥下理行

勅夫狗義保躬賢哲罕兼其致原心觀行褒沮得
伸其公惟節惠之舊章實經世之明勸不有正議
孰旌遺烈故開府儀同三司太子太傅上柱國萊
國公寇準器質莊重風猷簡貴感會先聖綢繆上
司明心若丹直道如矢逮余主鬯之日實乃秉鈞
之秋圖惟協恭罔有二事違盜言之噂沓挾危法
以中傷白璧易汚貝錦難辨再罹避謫遂及云亡
終悲寒露之歸徒軫幽泉之痛間雖遊存伸澄雪追

賁寵嘉而誅功易名尚闕恩禮沈謀秘畫淪於疑
論逝者莫愬朕甚閔之謚法有危身奉上曰忠佐
國遭憂曰愬合是休典慰其熒魂宜特賜謚曰忠
愬

寇忠愬公旌忠之碑

叅知政事孫抃奉 勅撰

勅

上祀合宮之明年夏四月召兩府臣諭之曰故太
子太傅萊國公寇準方嚴鯁亮有文武偉才在
太宗

真宗朝建大功立大節輸謀納忠誠貫白日不幸
以譴終朕甚嘆嘉之其勅史氏誤揚勲烈具志於
石用垂示來世遂以命臣抃翌日又下詔賜旌忠

之額且親篆以賁寵焉臣承命恐悻謹拜首稽首
書其事公諱準字平仲其先出上谷昌平蓋春秋
時司寇蘇公有勞於王室因官以命氏後世率多
聞人若東漢恂子翬翼漕河內破蘇茂畫像雲臺為
中興勲臣曾孫侍中榮以辨紮亡匿宗黨潛散他
土故譜諫亡傳又數世有徙居馮翊者籍於三峯
下遂為華州下邽人曾祖賓祖延良以唐末亂不
仕父湘博古嗜學有文章名晉開運中登甲科冠
多士後應辟為魏王記室終焉知人者惜之以公

貴封燕陳晉三國公贈官至太師尚書令曾祖母
白氏祖母鄭氏母趙氏封許陳曹三國太夫人準
始生風骨峻爽與常童不類及從師入學校趨隅
占對毅然有成人風采既冠讀左氏公羊穀梁傳
不俟講說不循注疏三家異同之說輒援筆剖析
以辨明之辭道理正沛若大手先儒老生曰是真
所謂宿習者年十九一舉擢進士第解褐授大理
評事知歸州巴東縣時太平興國五年也後三歲
補大名府成安軍三遷殿中丞調兵食於西夏還

差通判鄆州得召見稱旨遂給劄試禁中授右正
言分直東觀中謝日賜緋袍銀魚罷汶上之命克
三司度支推官俄轉益鐵鑄司判官公事會詔百
官邊事準極疏利病天子噐之擢署尚書虞部郎
中克樞密直學士賜金紫判吏部東銓未幾丁曹
國太夫人憂有詔權奪不得已起視事淳化改元
授左諫議大夫克樞密副使尋改同知樞密院事
封上谷縣開國男是年十月領青州明年九月召
赴闕守本官叅知政事中進封上谷郡開國侯至

道二年閏七月知鄧州

真宗皇帝嗣位遷尚書工部侍郎咸平元年五月
移河陽軍二年八月改同州三年夏朝京師行次
闕鄉就授鳳翔府五年五月詔詣行在轉刑曹權
知開封府六年六月遷兵部克三司使進封開國
公時始復益鐵度支戶部為一使景德六年特授
守本官同中書門下平章事集賢殿大學士二年
十一月加中書侍郎兼工部尚書三年二月罷相
進刑部尚書知陝府祥符初扈從東封回遷戶部

尚書知天雄軍四年四月改兵部尚書車駕幸亳
權東京留守六月遷檢校太尉同中書門下平章
事克樞密使八年四月罷機務授同中書門下平
章事持節鄧州諸軍事行鄧州刺史克武勝軍節
度鄧州管内觀察處置使知河南府兼西京留守
司移判永興軍天禧元年二月換節襄州三年四
月詔赴京六月特授行中書侍郎兼吏部尚書同
中書門下平章事克景靈宮使集賢殿大學士十
二月改尚書右僕射四年六月罷相授太子太傅

進封萊國公九月降授太常卿知相州八月移守
安州途次棗陽貶道州司馬乾興元年二月再貶
雷州司戶參軍準疏通博裕果敢沈毅能斷大務
不循細檢喜風幹善議論與人無城府接物無崖
岸碩大義可為者必奮厲翔躍以身先之其勇若
賁獲至於外險中艱斬然涯垠亦坦坦無退衄意
聞一善薦道推輓不進用不已附離苟合者疾之
如仇讐初補吏治二邑推至信部中會期賦役止
計鄉里姓名諭寺門民赴之無毫髮稽遲者本道

論薦至有以魯恭卓茂為比嘗奏事

真宗言切直上怒起準以手攀帝衣復御座持議益勁固神色瞭然事既決乃退上曰此真將相才吾得之若唐文皇倚魏鄭公爾歲大早上問政關失準對曰在洪範天人之際若影響是固刑有所不平爾祖吉王維皆陛下朝臣頃曲法受財各仗萬計吉伏誅家具籍沒維止校於私室仍領濠之定遠簿蓋叅知政事汚同母弟也陛下重輕如是亢燠之咎殆天所以誠告上嗟悟者久之咸平景

德中契丹頻歲犯塞多縱遊騎剽掠小不利即引去偽徜徉無鬪意準曰是狃我也願朝廷練帥領簡驍銳分據要害地以捕之是冬果大舉舉國來寇越瓦橋攻高陵直抵於澶魏將飲馬河濡

真宗憂之召羣臣議或曰寇深及矣宜戒嚴京城益重兵守衛或有西南之幸準止之曰淺議方今聖德明備上合天心將臣協和叅講師律若帝馭順動一舉而北彼黨類自當遁走設未然則出兵以撓其謀堅守以老其衆顧主客勞逸之狀我得

宋史卷一百一十五
五
勝筭必矣上悅於是大駕北征至澶南城中外獻
言願駐驛以觀形勢準曰不過河則人心未寧虜
氣未懾非所以取威決勝也且王超領勁兵屯中
山以扼其亢李繼隆石保吉以大兵扼其左右肘
四方征鎮赴援日至何慮而不進固爭之連頓首
於上前意氣詞語憤然感慨是日幸北寨御北樓
觀視營壁撫勞部伍軍民歡叶自近及遠聲振於
數郡虜相視怖駭不能成列俄而勁弓伏發殄其
元帥因密奉書以請盟朝廷始遣曹利用往成之

御史缺準取沈毅敢言士塞詔同列者不悅屢白
吏持例文進準曰宰相所以器百官今用例則所
謂進賢退不肖乃虛語耳命去之故士擢用在準
持衡時得人為多先帝倦庶政丁謂曲奸迎合結
權倖以用事準請問便殿數其姓名曰某與某皆
壬人異時不可輔少主願更擇方亮大臣為羽翼
矧皇太子睿德天縱英聲日茂延師傅議經史默
識古今成敗事見臣僚決機務周知天下安危計
雖周之成漢之昭殆難以擬議陛下胡不協天人

之係望講宗社之正謀引登大明敷照重霄固祖
宗萬世之基本言訖俯伏鳴噎議未下明日黨人
以急變聞飛語密中準準坐此得罪既行過零陵
踰大陂護兵從騎先後不屬溪夷乘間鈔掠而去
已而酋長召告之曰聞寇準在道若等柰何竊賢
相行橐神明其祐若乎趨遣種人持所掠還準伏
道下引罪且拜公慰遣之至南海晨旦朝謁從事
如常時謂其子曰守法奉正士人常操以窮通成
敗易之者非吾意先是署東偏屋凡數楹陋不庇

風雨準完基訪材構為層樓置几榻其間經史老
莊及天竺書環列前後暇或看誦之賓至則憑高
瞰虛笑語燕燕若初無廊廟之貴者嶠南山水峻
絕其道路往往斬崖瀕澗曲折高下馬不能平進
郡縣官有伐竹為輕輿以迓準者準謝曰吾罪人
騎馬足矣冒炎溽捫險阻日行百里左右為之泣
下準昂然無隕穫容色其度量過人如此及雷陽
吏以圖獻閱視之首載都東南門抵海岸凡十里
準恍然悟曰吾少時有到海祇十里過山應萬重

之句迺今日意爾人生得喪豈偶然耶自是色空
夢幻深詣諦法危坐終日寂無他營天聖元年閏
九月移授銀青光祿大夫檢校國子祭酒行衡州
司馬是月七日以疾終於貶所年六十三嗚呼非
常之功遇非常之器業然後成不世之節待不世
之忠賢然後立且準初繇計府入輔屬三聖紹統
四隅和晏上方講稽儒術尊右文教以成太平之
形容敵人睚眦出我不意衆號百萬北方騷然文
紳武綏策慮倒置準抗難犯之色建不佞之議天

威燁揚霆激而雷掣大惠鋪迪春熙而日融民焉
息肩士也卷甲憬彼氛祲凝為至和逮今三紀矣
而羽書不馳烽燧不舉義信惇結古無與隣準之
功馬伏波周尚父之功矣洎自秦川再相時闡閭
親政猾儉當路恟恟中外靡遑底寧準密圖本元
深遏萌漸毅氣一吐形於謨明排邪斥疑濱死不
顧聞準之風者心魄駭視而後知大正不可干大
奸不可肆大名不可取大器不可窺佞夫忠懦夫
有立志及

真皇棄天下倖黨斂手畏伏忠義兩宮坐朝廢政
平一輔翊慈惠卒隆寶圖準之節霍子孟狄梁公
之節矣準篤志於學而晉公亡歲時祠祀感激涕
淚泣然若孺慕者終其身不易在成安兄弟以卜
葬為請準曰未也父為士子為大夫葬則士祭則
大夫吾先人以文學中高第卒事王藩若追贈未
逮則陪臣矣吾豈忍以士禮葬既通顯乃護二喪
還成安太子遣中貴人勉諭賙恤恩數踰等大為
縉紳榮初丁崖貳政以諛冒自任又能陽為戚施

伺人顏色密圖忌間之漸一日會食政事堂羹瀝
準鬚謂起以袖徐拂之準正色曰公忝國大臣乃
曲躬為官拂鬚邪謂大愧其後邪正寢戾甚於冰
炭簧言營營日肆媒孽準簡固醇挺未始一疑於
心故及南遷之難至今天下皆寃之無幾何謂敗
得竄道由海康準從者有欲釋憾謀不利於謂準
知之陳大席一廡間設戲具悉召坐且命之博奕
因隱几觀焉聞謂行乃罷平生著述於章疏尤工
國政民事亡巨細均校利害為上悉陳之其旨粹

其言簡故多所開益餘藁都焚滅棄去雖至戚不
得見好爲詩警策清悟有劉夢得元微之風格其
氣談竒拔則又過之準起諸生兩朝內外更委幾
四十載其間較評詮選摠決浩穰主財利之煩膺
居留之重助敷密畫叅告大猷剖符十藩持節二
鎮一踐樞弼再登宰輔小則糾逖逋隱刷除弊欺
嚴之以關防正之以繩墨差立定格牢不可踰大
則鼓動賢業彌綸帝載朝家系之休戚政教闢之
治亂表正四海斷焉一德凡累封戶萬二百真二

千七百爵上公階勲極品功臣始賜推忠佐理加
推誠報德崇仁忠亮翊戴人臣之遇其亦至矣然
而不置私第不營田園所得俸賜皆分給宗黨故
舊去之日家無餘資及

朝廷許葬洛師獲還之費僅能完給久之詔復舊
官爵賜諡曰忠愍公前娶許氏故給事中仲宣之
女不及準而亡再娶宋氏故左衛上將軍邢公延
渥之女封晉國夫人準無子以弟之子隨為後隨
勁介有履行終於殿中丞女四人長造樞密使尚

書吏部侍郎同中書門下平章事王曙次適太府
卿畢慶長次又爲畢氏繼室次適司封員外郎直
史館張子臯孫四人長諱贊善大夫次誦誠並大
理評事次諭未仕君子謂公慮已也輕以約謀國
也勇而固義在則死不足畏義亡則生不足惜勢
無以移其操利無以疚其心出處始終孚合大正
昔之垂勲名載簡編者有幾宜乎沒世三十年而
完天子思之生民懷之措紳景行之古風穆然炳
炳如在詩云樂只君子邦家之基準之謂也銘曰

太宗膺圖章聖御極丕昭武經誕布文德準起孤
童遂階貴籍歷事兩朝薦釐庶職剛嚴俊明篤厚
正直非義不蹈非忠不迪開補治具栢栢智力指
陳機宜侃侃容色遠人猖狂入犯王域蟻結魏南
狼跳燕北準抗一言羣類惕息天嗣繼照閩慈叅
翊猜萌構險佞間投隙準矢一謀姦人跋踏晏晏
萬務愉愉四國如石之堅我社我稷如山之安我
疆我場亮節高峙諛言衆惑勞既不圖咎從而得
風濤莫涉瘴嶺晨陟氣凌飛雲誠貫白日至於隕

世曾靡憂戚道無久否帝用近惜申詔在庭俾書
其實海田變更陵谷遷易準之大名時萬時億

吳門來青閣書坊楊壽洪日前挾書入都余訪
密舍狂搜遂底苦抄善本嗣得此帙重其為明謝
氏小草齋所寫目既歸取此本校讀一過竟夜而畢
原本十行二十字版心下方有小草齋鈔本五字有晉
安謝氏家藏圖書周雪客家藏書二印索真昂
不得以校竟遂以歸之庚申十月二十五日增補記

寇忠愍公詩集卷上

開府儀同三司太子太傅中書令上柱國萊國公寇準著

贈本傳

奉和 御製中秋翫月歌

戒井銅龍漏水平玉輪初滿物華清光連南極星
輝正影泛中天帝宇明風來蘋末披輕霧香濕蘭
叢浥零露絳河橫度燦雲章靈鵲羣飛遶宮樹法
久照兮慶昌時樂芳宴兮忘疲敷睿文兮玩澄景
當巖更兮漸永九門秘邃敞堯宸霽霽金波矚目
頻進牘豈能抽鄙思賡歌深媿預朝倫

奉 聖旨賦牡丹花 時正言直館

栽培終得近天家獨有芳名出衆花香遍暖風飄
御座葉籠輕靄襯明霞縱吟宜把紅牋襞留賞惟
將翠幄遮深覺侍臣千載幸許隨仙仗看穠華

奉和 御製南郊禮成

薦降靈符昭瑞命交脩盛則薦清衷朝真曲里揚
丕烈顛帝圓壇報昊穹述職萬邦咸執玉來庭異
域協占風禹功高大天無極堯德明如日正中福
浸含生臻富壽澤流綿宇霈龐鴻藻盛豐潔神皆

饗金石和平政本通鬱鬱雲烟當畫麗熙熙景物
共春融羣臣抃蹈瞻宸宸願比南山祝壽躬

奉和 御製真遊殿上梁

敦崇妙本膺丕貺濟發鴻源示永年吉語密傳當
乙夜粹儀祇覲擁祥烟皇心翼翼精齋至祖德綿
綿道誨宣誕集純禧彰錫羨交修茂典表欽先爰
稽大壯新瓊宇仰法殊庭設綺筵山積瓌材咸備
矣神扶華棟見巍然元龜獻兆良辰協哲匠施勤
庶藝全四柱如翬循寶勢觚稜削玉燦珠躔黼帷

夙設宸居麗翠葆躬臨聖志虔昭荅明靈陳盛會
睿詞敷暢煥雲牋

奉和 御製郊外觀稼

天苑清塵宿雨收翠華觀稼慶盈疇氣和玉燭成
豐歲露冷金莖凜素秋日麗鮮原平杳杳烟含嘉
穀鬱油油共知省歛敦農事信史騰芳紀勝遊

瑞慶園觀稼奉 聖旨次韵

善苗棲畝昭靈貺禁苑鳴鑿值素秋歛籍神倉符
禮本采詩良耜慶農收宴開雲幄皇慈洽日駐天

衢瘠賞留千載逢辰增嶽抃清塵叨從屬車遊

應 制賞花

上苑經春雨宸遊屬盛時花光籠寶檻柳色暗龍
池漱灑雕觴滿融和暖日遲共歌成至樂千載播
聲詩

應 制太清樓觀書

仙禁開書府神毫紀格言簡編包舜禹圍範總乾
坤稽古崇邦教斯文闢聖門從遊觀奧秘何以報
宸恩

御製乃眷儲闈方崇學術錫羣書於冊府
勵至業於承華日命近班同觀盛事七言
十韵詩一首奉 聖旨次韵

景命昭彰宥德基元儲敦裕協祥期寢門劬至嘗
無怠學肆多聞詎有疑金玉騰音鏘睿律簡編申
錫振良規河圖奧秘言誠訓藝圃優柔善益資玉
宇風清傳密詔蓬山雲委錫芳蕤天顏不遠回宸
眷肉味都忘聽寶辭燕翼詒謀欣教盛上庠隆道
慶才竒叨逢華旦居黃閣久侍宣遊近赤墀恩厚

薦承三畫接力微寧致百工熙東闈疏問英猷遠
聖慮乾乾更念茲

御製慶元后升祔禮成七言六韵奉和

天錫靈符興寶祚澤流綿宇福舍生蒸蒸至孝咸
歸厚翼翼精衷尚執盈順考漢儀彰道廣欽崇周
典闡文明豆籩合饗豐盛備管磬同和雅奏成愛
景融輝昭善應非烟絢采協殊禎尊升茂典光博
史稽古鴻猷振帝紘

應 制賞花釣魚

龍禁舍佳氣鑿輿下建章碧波微蕩漾紅萼竟芬
芳玉笋春醪滿金波晝漏長逢時空竊抃萬寓正
歡康

和 御製降聖節內中道場觀瑞鶴神雀
歌

秋殿霜凝當永夕靈場齋潔方無數高真諄誨昔
親聞上帝休禎今再覲鬱葱兮卿雲仙鶴兮不羣
肅清兮采席神雀兮振翼香飄華燭焰亭亭風度
翠簾聲歷歷嘉應紛綸寶運昌聖人功與天無極

奉和 御製奉祀述懷歌

巍巍至德克綿寓翼翼宸心臨兆庶覆育懷生動
法天講求茂典皆師古協和神化踵唐堯彬蔚頌
聲踰吉甫赫奕皇威振八荒清夷王度綏中土豐
年朝野正歡康溢牒克圖福紀祥睿聖繼明恢大
業禎符錫祚降穹蒼省方展寀宣邦職登岱銘功
舉國章睢上埋牲專事地漢唐故實存聞紀精靈
昭感果潛通瑞應昭臻知所自颺羽光臨神告彰
洪源肇啟仙遊暨瀨鄉舊壤闢珍詞款謁齋莊敦

睿意譙都奏牘達彤庭者耄雲趨共瀝誠順考皇
儀尊妙道再脩盛節徇典情聲明文物當興運申
命羣儒究禮經秩秩德音咸布惠穰穰景福必求
成恭虔必祠為齋久企仰真風志克勤肅奉蕭薌
嘉薦備廣覃慶賜湛恩頻式揚丕烈心彌潔祇上
鴻名道益伸將覩虞巡陪法從幸同鳧藻樂昌辰

大安殿致齋

國陽崇大報王宇藻多儀散致尊王度懷柔祝帝
信儲精通合漠玩志協激夷律正風來迥宵長月

上遲漏筒聲淅瀝陸戟影流離夙戒羣倫序交歡
百慮怡星繁陳法仗雲密蔭平遠傳曉鳴梢動威
容整率祇

大安殿酌獻 天書

聖運昭惟永高真協降祥方嚴泰壇祀先薦金山
章典禮官無曠消辰筮有常中天華闕秘象袞睟
容莊宵迥星河燦風微羽衛揚獻酬靈契接陟降
寶儀彰顧謐欽元命寅恭達上蒼彌文輝竹帛備
物儼蕭薌尊道宸心至登春雅俗康猶將奉齋潔

禋福俟穰穰

西垣致齋日因成一章呈二相公

攝事脩雩祀齋居近紫庭千門夏雨歇萬樹夕陽
生更散掖垣靜風來鐘漏清巖廊慙舊德書殿愧
羣英白髮將何補丹心忽自驚敢言陪邴魏三接
奉休明

瓊林苑應 制

鳳蹕出重城宸遊順物情檻花紅藥盛苑樹綠陰
成雨過池塘靜風來殿閣清樂和堯酒滿千載樂

昇平

和 御製祀后土

臨晉迎清蹕靈壇備克禋薦誠祠后土求福爲蒸
民展義王猷遠推恩慶賜均千官陪漢祀萬國奉
虞巡仗衛明初日郊原麗上春花飛函谷路柳暗
大陽津宿麥深藏雉柔柔遠映人河流迴二陝山
勢壯三秦簫鼓聞睢上旌旗過渭濱天聲 野
兵氣懾 隣在鎬皇權洽橫汾睿藻新周南慙滯
迹空想屬車塵

述懷

吾家嗣儒業奕世盛冠裳挂籍冠倫輩天下知聲
光有才無其命不得步玉堂余亦好古者詩禮承
餘芳赴義忘白刃奮節凌秋霜垂衣遇聖主射策
遭時昌十九中高第弱冠司國章棘寺陪法吏奉
使安殊方薄才難變俗賤節唯勤王務簡忽興念
不覺心徬徨慈親違萬里瘴雨悲南荒端居增浩
歎離恨銷剛腸木落多異感蟬鳴非故鄉長思千
萬乘奉職昇周行步武親玉陛獻納肩忠良功成

自高退散髮遊滄浪

古別意

水螢光淡曉色寒庭除索寞星河殘清樽酒盡艷
歌闋離人欲去肝腸絕露荷香散西風驚征車漸
遠聞雞鳴深閨從此泣秋扇夢魂常在遼陽城

江南春

波渺渺柳依依孤村芳草遠斜日杏花飛江南春
盡離腸斷蘋滿汀洲人未歸

追思柳渾汀洲之詠尚有遺妍因書一絕

杳杳烟波隔千里白蘋香散東風起日落汀洲一
望時愁情不斷如春水

遠恨

敗葉亂如雨暮蟬聲似哭感物悲昔心佳期悵難
續雲山雖阻歎韶華若在目深情染絲牋密密空
盈幅溫瘴鴈不來遊魚隱深谷羽鱗孰可憑音書
安可復焚灰寄長風字滅魂亦逐

雜言

吾徒曠達由曾臆恥學鯁生事文墨蛟龍長欲赴
庭起寒燒餘基雖索寞清問長光耀旌賢誰再興
勿使過者誚

水閣晨起

板閣常晏眠偶獨起清旦月落簷鳥語烟開客舫
散長江色自澄汀樹聲空亂羣動又復然勞勞可
長歎

晚望有感

出門望寒野四顧惟椒坡憶昔楚大夫還此情如
何殘陽半明雨水落西風多因同下蔡恨不覺增

悲歌

庚辰歲將命至已東時已秋序霜荷索然

偶賦是章用遣幽恨

乘軺偶將命撫俗烟江湄地僻接窮峽務簡稀公
期秋信任無趣野懷良自宜月白夜蟬響池暗風
荷衰溪雲入破牖山菊開踈籬貫酒不能醉鄉園
空結悲徘徊獨凝望目極長天涯

成安感秋

蟬噪木葉下遠客忽驚秋凝恨悲晚候萬緒皆如

抽芳時同夢幻急景如奔流念我何為者年來生
百憂貧居負勝事壯歲傷羈遊臨民慙墨綬垂釣
思滄洲達則濟天下窮當守一丘胡能效時輩
目隨沉浮

感興

憶昔金門初射策一日聲華喧九陌少年得意出
風塵自為青雲無所隔主上掄才登桂堂神京進
秩奔殊方墨綬銅章竟何用已雲瘴雨徒荒涼有
時扼腕生憂端儒書讀盡猶飢寒丈夫意氣到如

此搔首空歌行路難

暇日

江樓晝靜春陰變日午簾空飛乳鷺帆稀客散野
岸空隱隱遙峯望中見

又

郵亭落日多飛絮琵琶音重江春暮坐久凝眸欲
斷腸梅雨如烟暝村樹

南浦

春色入垂楊烟波漲南浦落日動離魂江花泣微

雨

長郊雨餘遠樹成翠新蟬忽鳴激耳嘹唳
以客孤坐情如何哉形之於文聊以自遣
遙山夏雨歇遠樹涼風至憑欄偶開襟新蟬動秋
思沙溪潔細流庭木驚踈翠節候又復然幽憂斯
所萃芳歲若奔流羲光不停轡感物悼前期誰知
此時意

雪霽池上

雪霽池上亭晴光照泉石暖覺岸冰消靜聞簷溜

滴務簡身暫閑景幽心自適極目望南山圭峯露
微碧

有寄

金陵煙草綠玉塞霜天白萬里隔關山年來斷消
息

寇忠愍公詩集卷上

寇忠愍公詩集卷中

春日登樓懷歸

高樓聊引望杳杳一川平遠水無人渡孤舟盡日
橫荒村生斷靄深樹語流鶯舊業通清渭沈思忽
自驚

秋思

秋氣動天地恍然情未窮故園應墜葉昨夜又西
風白草侵危堞寒濤接遠空搢頤當此景無語夕
陽中

再歸秦川

阮路何方盡西歸興未勞
河流經陝狹山色入秦
高返照明秋壘孤村接暮濤
還如丁令至故里滿
蓬蒿

秋夜獨書勉詩友

西風驚萬木危坐思悠哉
故國經年別秋鴻半夜
來人應多棄善天豈不憐才
休學嚴夫子荒涼老
釣臺

長安書事

一從洛邑移秦甸三見東郊綻蚤梅
蓮府晝閑鈴閣閉柳營春暖射堂開
齋壇首冠慙諸將相印兼營接上台
何事燕公輕仗鉞却言分閫是粗才

重陽登高偶作

務閑留上客佳節值重陽
旨酒浮仙菊清歌遶畫
梁高城明落日踈樹覺微霜
且盡登臨興餘歡尚
未忘

塞上

春風千里動榆塞雪方休
晚角數聲起交河水未

流征人臨迥磧歸雁別滄洲我欲思投筆期封定
遠侯

寓居有懷 時年十四歲

疎林頻落葉孤僻繼離騷獨坐聞鴻遠閑吟見月
高夢回更自永思苦夜何勞寂寂西郊內披衣聽
海濤

重到進公院

五年重到支公院物態人情盡不同唯有寒檉暗
秋色依然蟬噪夕陽中

野步

幽景恣追尋遲遲傍柳陰靜思非世務孤立是閑
心村迥遙峯出溪明返照侵片沙招野步白鷺伴
高吟積雨迴塘漲微晴疊翠深春鳩鳴古寺烟草
入平林迸筍行無定飛花勢不禁凝然客亭上鄉
思獨沈沈

秋日原上

蕭蕭古原上景物感離腸遠嶠收殘雨寒林帶夕
陽溪聲迷竹韻野色混秋光吟罷還西望平沙起

雁行

江上晚望懷所知

遲遲迷遠信閑立大江隅遊子在何處秋風吹五
湖潮迴沙鳥聚岸濶釣舡孤歸去還堪歎田園半
已蕪

秦中感懷寄江上知己

念子隔江海浩然時已秋蟬鳴關外樹人在水邊
樓髮白猶搜句時清尚旅遊遙思當永夜不寐向
孤舟

水村即事

虛齋臨遠水吟釣度朝晡葦岸秋聲合莎亭鶴影
孤片雲藏疊巘楚燒起寒蕪獨步時吟望離人隔
五湖

暮
莫秋感興

萋萋前期遠窮途一可傷有時聞落葉不語立殘
陽塞草秋先白溪沙晚更光那堪望天末燕雁又
成行

秋夜感興寄吳順之

耿耿不成寐楚鄉經暮秋故人遙海嶠寒月滿江樓
閉戶生蒼蘚安閑到白頭如何太平日獨不出汀洲

夜坐有懷寄張士遊

一作遜

清秋吟更僻况復古亭間少夢虫聲碎無風樹影
閑月華澄曲沼霜氣滿空山不見張夫子誰人共
往還

送人下第歸吳

鶯老計還失負書歸故鄉杏園無近路澤國有高

堂白鳥迷幽浦寒猿叫夕陽離懷休墮淚春草正
茫茫

秋訪江上友生所居

苔石半寥落坐來生遠愁故人應罷釣寒葉自驚
秋村隔平沙暝江和暮靄流徘徊不能去此處有
扁舟

冬夜旅思

年少嗟羈旅烟霄未進能江樓千里月雪屋一龕
燈遠信憑邊雁孤吟寄嶽僧爐灰愁擁坐硯水半

成冰

貽趙少府

夫君何感命十載困風塵薄宦須流落孤吟更苦
辛山寒泉易凍遠近草難春珍重常招隱慙非孟
子鄰

春日懷張曙 時年十六歲

不見張夫子巖花幾度新久閑空賦命遠別更傷
春雨艇愁天末烟兼惡渭濱應嗟年未冠已作異
鄉人

初夏雨中

綠樹新陰暗井桐雜英當砌墜踈紅重門寂寂經
初夏盡日垂簾細雨中

感興寄蓮嶽一二詩禪友

西風傷遠別前計竟成非芳草此時莫故山何日
歸禪應同雅道貧合長天機翻憶雲溪伴無膠對
落暉

贈隱士

夫子才名重貧居志未勞吟當寒夜苦閑到白頭

高心地通禪寂田園近海濤不知千載後誰更續
離騷

湖上作

極目望南浦望中生遠思雁沈芳草渡燒斷夕陽
陂歲月寒萍梗江山念別離猶餘清夜夢暫與白
雲期

有懷

秦川春婉晚漢水路迢遙不待凭危檻離魂已暗
銷

送李生歸秦中

酒闌還執手之子擬歸秦風雪過殘歲山川近早
春久遊詩思苦遠別柳條新後會知何日空餘淚
滿巾

書懷寄韋山人

萬事不關慮孤吟役此生風騷中旨趣山水裏心
情衆木彫寒色空江噴暮聲終期謁君子同遠綠
苔行

閑夜圍碁作

歸山終未遂折柱桂復何時且共江人約松軒雪夜
碁

紙鳶

碧落秋方靜騰空力尚微清風如可託終共白雲
飛

春雨

散亂縈花塢空濛暗柳堤望迴腸已斷何處更鶯
啼

夜坐懷故友

西風起窮巷衆木又彫零蕙浦月華白竹窻燈影
青故人難重見鄰笛不堪聽行傍秋池上孤吟對
遠星

南陽市上各賦玉蝴蝶花一絕

堪賞東君造化竒裝成蝴蝶滿纖枝粉融輕翅攢
香蘂疑是尋芳未去時

鄴北旅中懷友人

浮世多塵事悠悠難定期夢闌懷遠夜秋盡望鄉
時道在應無悶風澆自業詩何當窮釣渚搢肘一

沈思

弔任瓘處士

一生長抱恨終亦是貧居遺信留孤鶴營墳賣古
書竹齋無俗物秋圃有寒蔬福善何言味悠然望
太虛

秋懷

落日留不住默然空淚零敗莎侵陋巷踈葉滿閑
庭有趣窮風雅無機敵杳冥浮榮安足戀歸去亂
山青

送友生下第南歸

頻頻退禮闈此去欲忘機霄漢貧難達江湖老獨
歸程遙秋浪疊村暝夜燈微應使為儒者翻悲苦
業非

邊城春望

獨望原西路離襟倍黯然青山遮故國絕塞度新
年風聚沙迷岸烟開燒滿川歸心正無際驃騎莫
留連

草

獨步高原上依依動所思無人尋蕙徑落日滿江
湄楚澤晴芳處秦川晚翠時此中興廢事千古復
誰知

送左眉川之任

分官離法署承命守眉州山館隣孤寺春城過亂
流江雲長映日蜀魄似悲秋到郡揚清政遺黎病
必瘳

楚江夜懷

西風生遠水蕭颯度吟臺明月夜還滿故人秋未
來寒蛩啼暗壁敗葉下蒼苔誰念空江外年年首
重迴

春日書懷

曾讀前書笑古今恥隨流俗信浮沈終期直道扶
元化敢為虛名役片心默坐野禽啼晝景閉門官
柳長春陰世間事了須先退不待霜毛漸滿簪

離京日作

離歌豈忍樽前聽別恨無由醉裏消余久不飲酒故有是句
惟有夢魂歸北闕不知京洛路迢遙

夜泊江上

歲莫^暮峽中村維舟古樹根羣峰初落日夜後獨聞
猿流水自無盡客愁那可論平明離楚岫迢遞指
吳門

新蟬

寂寂宮槐雨乍晴高枝微帶夕陽明臨風忽起悲
秋思獨聽新蟬第一聲

寄獻廣南許虞部

南國江山五十州星郎從此播芳猷詩窮雅道皆

清唱官重名曹未白頭望斷蠻村烟樹遠吟殘嶺

月海風秋三年政滿迎丹詔諫署重膺仄席求

送吉上人

新鴻并落葉正逐朔風飛此地仍分首何山是所
歸問程雲棧遠宿館雨燈微莫恨天涯別重尋志
未違

秋夕書懷

官路時風漸識情一悲前計遠愁生深秋寒氣侵
燈影半夜疎林起雨聲縣印終年拘吏役烟蓑何

日避浮名窮通休問巢蓮骨大抵無徒是至清

春郊閑望

風騷高處謝知音公退何妨縱野吟弱柳不能牽
別恨片雲應念識閑心沙平古岸春潮急門掩殘
陽莫草深凝望江臯動幽興數聲鐘磬出西林

雨中書事

一雨起前浦霏微向暮秋誰方眠釣艇我獨在江
樓山晦峯巒隱烟凝島嶼幽何當見晴旭一得泛
迴舟

夜懷寄友生

遙夜獨無趣恍然思故交泉聲飛石壁星影動林
梢志壯難低俗情閑任戲嘲秋山雖入望猶不似
衡茅

秋夜懷歸

背窻寒燭影沈沈楚客鄉思欲不禁板閣漏殘人
自遠水螢光淡夜方深牢愁聞雨眠踈屋歸夢隨
雲徹故林憶着烟村舊風景柿紅時節又鳴砧

夏夜閑書

雨濛村落野梅黃茅閣長吟水氣涼幽鳥遠聲來
獨樹小荷踈影占前塘閑心終不忘魚釣澹分真
宜習老莊報國自知無世用烟蓑何日卧清漳

秋興浩然追憶館殿幽致偶成長句寄徐

休學士

輶車南去詠江天閑憶羣賢倍黯然御水莎青孤
立鷺宮槐烟冷數聲蟬石渠吏散簾風靜鳳闕雲
歸霽景鮮幽致不知何日共思君惟賦帝京篇

宿江西寺

獨宿西林夜凝然靜擁袍巫雲秋暝峽楚月冷生
濤莎敗蛩猶噪鄉遙夢亦勞霜風開落葉還欲續

離騷

聞杜宇

曾為深窻無處雪長年江上哭青春平林雨歇殘
陽後愁殺天涯去國人

巴東寒食

春雨蕭蕭寒食天遠行猶在楚江邊人思故國迷
殘照鳥隔深花語斷烟薄宦未能酬壯節良時空

自感流年因循未學陶潛興長見孤雲倍黯然

春晚書事

春盡江天景寂寥思鄉還共楚雲遙林花經雨香
猶在堤柳無風絮自飄水國獨慚臨縣邑烟郊爭
合負漁樵青梅時節遲歸計且逐餘芳殢酒瓢

月夜懷故人

清夜月初滿蘚庭吟更幽梧桐踈影老蟋蟀亂聲
秋舊國情何極空江思欲流故人今底處危坐獨
凝愁

和趙瀆監丞贈隱士

不愛簪裾陪盛列終年深隱養天機靜聞風雨眠
漁艇閑稱林泉掛道衣門接水村多埜色鶴當莎
徑立殘暉高吟幽賞無羈束始覺趨時事已非

雨夜書事

離人聽積雨滴滴動鄉心故國程猶遠重門夜正
深氣昏濛燼燭巢冷語棲禽遙想江南地餘花委
故林

歸州留別傅君

楊柳如絲拂画橋此中留語欲魂銷還愁別後巴東館獨聽空江半夜潮

秋晚閑書

吟情自覺都無趣况復離居感物華厭讀羣書尋
楚徑閑收落葉煮山茶燒殘寒菊花猶在霜過香
橙味轉加因想前期重搔首不堪秋思極長沙

聞笛

平野人歸后孤城日落時西風聞一笛惆悵憶桓
伊

縣齋春書十二韻

縣幽無俗事公退只高吟江到荆門澗山連蜀國
深峽雲長映日蠻雨易成霖羣雀鳴春院饑猿叫
夜岑庭荒多古木地僻見沙禽印鏤殘陽後人歸
疊翠陰思鄉空索寞素分信浮沈樂靜稀塵累甘
閑負壯心衰容常懶擲病髮豈勝簪寡欲慵求友
防邪每自箴澆風終恥合前事固難謀望斷天涯
外離魂欲不禁

余頃從穰下移涖河陽泊出中書復領分

陝惟茲二鎮俯接洛都皆山河襟帶之地
也每凭高極望思以詩句狀其物景久而
方成四絕句書于河上亭壁

堤草惹烟連楚綠岸花經雨壓枝紅年來多病辜
春醉惆悵河橋酒旆風

蟬鳴日正樹陰濃避暑行吟獨杖筇却愛楚雲無
定處水邊容易聳奇峯

岸澗檣稀波渺茫獨凭危檻思何長蕭蕭遠樹踈
林外一半秋山帶夕陽

暮莫天窳落凍雲垂一望危亭欲下遲臨水數村誰
畫得淺山寒雪未銷時

秋夜懷洛下一上人

遊宦忘機久心源亦自澄夜聽吳苑雨秋憶洛城
僧木葉驚栖鳥寒窓暗靜燈何時過竹院一得問
三乘

題花

繁花昨夜香苞裂露裛風吹照楚堤能與離人添
悵望一時留與子規啼

春望書事

因晴每日向吟臺縱目山城景象開
白鳥靜投沙浦去落花閑逐堊泉來
客愁已被楊烟染春色難甘蜀魄催看
郎流芳無處問但將餘興酹黃醅

秋日懷友生

寂寂感離羣前期何足云人從秦嶺別
蟬向楚江聞村遠孤烟起山空白日曛
更逢踈葉落愁緒轉紛紛

春初夜書

水國淹留歲月空雲山東去阻千重
欲令遙夜春愁薄須賴黃醅臘酒濃
南浦有潮春柵鏤西窓無睡怯巖鐘
誰家幾點畚田火疑是殘星掛遠峯

江上

古岸蕭蕭聞去雁平蕪杳杳更斜暉
空江極目望不盡楓葉半紅人未歸

夜望

南亭閑坐欲忘機望久前村島嶼微
數點寒燈起烟浪江艇應見夜漁歸

送人

客亭殘照裏歌闌獨南行
芳草無斷色離人多別
情遠途方極目長笛更飛聲
莫動鄉關念徒令白
髮生

早春

溪水覺暖微函碧山杏經春半吐紅
不向此時拚一醉到頭無計柰春風

寄漳川隱士

志高長說恥鳧趨歲晏園林戀隱居
陋巷自甘棲

短褐侯門終不曳長裾夜吟雪屋冥搜句
春結烟簾老釣漁為我紅塵偶為吏
近來還寄絕交書

又

慵趨大厦戀山薇立志由來與世違
溪上有時逢靜釣雪中長日掩閑扉
自知天爵高人爵不愛朝衣換布衣
我逐浮名任飄泊清泉難得共忘機

題巴東寺

寺在啼猿外門開古澗涯山深微有徑
樹老半無枝望遠雲長暝談空日漸移
恐朝金馬去還失白

蓮期

贈隱士

夫子住東楚經年不到城
愛吟無俗趣貪靜得閑
名荒逕侵山影虛堂出
燕聲我慚為俗吏泉石負
幽情

南亭晨望寄唐知郡

夢覺偶晨起南軒還獨過
曉光生遠樹露氣冷踈
荷窻白遊塵少風清靜興多
遙知江郡守幽趣在
烟波

殘月

半夜沈清影宵殘猶半吟
已甘垂樹抄由得掛天
心淡色迷蓬戶餘光映宿禽
誰家傷早別凝思共
沈沈

又

光隨春漏細影共夕烟流
若近明河沒還疑墜玉
鉤

巴東有感

長歲天涯悲斷梗逢春無處不傷情
那堪日落紅

樓伴更聽蕭蕭杜宇聲

首夏書事

窓戶經初雨風清埜景饒閑庭猶戲蝶高樹已鳴
蜩世態貧中覺鄉思醉裏銷縱吟還獨步時復過
溪橋

和李逢同年水閣閑望

務簡凭危檻凝然感物華孤村經埜燒極浦見漁
家灘急舟難渡山高日易斜明時如道在焉復痛
懷沙

寒上秋懷

未識窮邊苦今遊信有之秋林殘照後關路獨行
時磧迴風長急天寒雁度遲離心已無賴更聽戍
樓鼙

送人歸吳

忽憶湖山景沿流興不窮孤舟將去夜絕塞已來
鴻白髮前期近滄州舊業空明時方道在莫更學
漁翁

秋日

吳興公詩集卷之
三
江天物候潛裏變氣爽初疑夏景餘雨漬亂苔侵
古壁風飄紅葉滿荒渠晚雲連嶽幽葳寺秋水澄
江靜見魚昔歲一鳴無所恨綠槐金藥任蕭疎

寄贈笠澤處士

笠澤漁人高節竒白頭猶自著蓑衣吟過竹院僧
留宿釣罷烟江鶴伴歸花落砌邊春雨歇酒醒林
際夕陽微中朝名士皆知已多說東來信亦稀

柳

曉帶輕烟間杏花晚凝深翠拂平沙長條別有風

流處密映錢塘蘇小家

喜吉上人至

鄴北至夔城三千里外程勞尋苦吟伴獨入亂山
行楚水秋無際巴猿夜有聲逢師不能寐因話故
鄉情

早秋二絕

年光苒苒暗推移坐惜流年感舊期獨聽早蟬秋
色裏潘安初見二毛時

一聽早蟬響坐悲芳歲闌新秋空索寞前事但心

酸

秋日武關道中

行塵漠漠起西風
來往征軒似轉蓬
駐馬幾多愁思苦
亂蟬裊柳武關中

早春

日暖經冰泮
潛回律管春
初驚柳色重
漸見草芽新
樽酒留歡少
雲溪入夢頻
惟應五侯地
行樂及芳辰

書山館壁

時年十九

秋作西南使
千林覆去程
四時無日影
終夜有猿聲
路入溪雲過
人穿鳥道行
不堪孤驛望
風雨動鄉情

送趙主簿之任惠安

蕭蕭征騎立長亭
遙指天涯萬里程
尊酒欲闌人欲別
夕陽絲管盡離聲

秋氣凜然庭木將墜
道謙上人有南征之
役賦詩祖行

洪府多佳致
師今欲此行
寒山連楚遠
白浪浸吳

平烟雨經秋迥霜鴻入夜鳴到時春未莫閑聽鷓
鴒聲

酒醒

勝遊歡宴是良圖何必淒淒獨向隅深院酒醒春
日晚只聞芳樹語提壺

南陽春日

水滿池塘花遶城日斜南陌暖風輕千門柳色春
烟淡獨倚高樓聞暮鶯

春日長安故苑有懷

唐室空城有舊基荒涼長使後人悲遙村日暖花
空發廢苑春深柳自垂事著簡編猶可念景隨陵
谷更何疑入梁朝士無多在誰向秋風詠黍離

送人遊邊

遠行當歲莫冰雪路難分足馬陽關外邊聲落日
關

惜花

深謝暖風傳馥郁長憂夜雨暗摧殘黃昏欲放笙
歌散更遠朱闌子細看

微涼

高桐深密間幽篁乳燕聲稀夏日長
獨坐水亭風滿袖世間清景是微涼

帝城秋望

登臨秋向盡千里見王畿
過雨山逾翠經霜菊漸稀
平原夕靄起高樹宿禽歸
一望關河道空令詠式微

禁中偶書所懷呈內翰同年同院二學士

朝回內省中默坐對西風
秋色澄寒沼朝陽上古

桐龍墀慚近侍魚浦憶踈蓬
會待酬恩了烟簑伴釣翁

新秋

孤吟遠砌時節又西風
悵望新秋在歡娛往事空
柳條微減翠蓼穗已飄紅
正是多傷感仍將別恨中

春晝

年長追遊興漸凋况兼巴峽景
蕭蕭閑齋為謝楊花到時
拂殘書慰寂寥

宋史公詩集卷中
三
秋日晚晴池上作

雨歇南山積翠明
淡雲消盡遠天晴
漪漣不動秋塘靜
獨拄寒筇遠岸行

夏日

離心杳杳思遲遲
深院無人柳自垂
日莫長廊聞燕語
輕寒微雨麥秋時

留題郡樓

千里關河一望間
登臨長到夕陽還
欲驅征旆歸朝去
更倚高樓看莫山

青州西樓雨中閑望

海上秋添寂莫情
萬家烟樹暝重城
蕭蕭細雨遙天暮
獨向空樓聞笛聲

中書秋日有懷青社舊遊因書一首

掖垣秋色生鷄樹
忽憶青丘感舊情
曾倚西樓吟暮雨
數峯寒碧遠高城

贈寶上人

重城蕭寺雖留滯
楚鶴由來性本閑
寒磬終宵鳴竹院
虛窓盡日對秋山
旋移怪石資吟賞
應有孤

雲共往還自笑紅塵成底事幽期長是負松間

雨夜許氏第會宿各賦四韻

雨夜銷煩暑林塘向夕幽庭虛惟欠月樹冷欲生
秋河北嗟新別尊前念舊遊若非逢勝會何以解

離憂

水閣夜望書懷

水閣中宵動寥寥起遠思秋風生折葦星彩動寒
池白社孤前約青雲少舊知苦吟空自歎風雅道
由衰

離京作

致君才業本無能戀闕情懷老不勝欲過龍津重
回首腫臃初日上觚稜

洛陽道中感懷

天陛初辭咫尺顏恩深猶綴補臣班漢庭舊友彫
零盡獨擁雙旌入武關

初到長安書懷

薦承丹詔撫彫殘適值年豈萬井安舊職尚薰黃
閣貴前驅新擁碧油寒靜憐風竹經宵聽老愛山

雲盡日看魂夢不知關塞外有時猶得到金鑿

遊花巖寺

寺對南山積翠濃水村鷗鷺下遙空層樓望盡樊
川景恨不凭欄烟雨中

寄京兆向相公 敏中

九萬鵬霄振翼時與君同折月中枝試思淳化持
衡者得到如今更有誰

和向相公見寄

玉殿登科四十年當時交友盡英賢歲寒唯有君

兼我頭白猶持將相權

送轉運梅學士 詢 巡邊郡 四首

悵飲惜離羣窮邊去路分雪深山館夜孤雁背燈
聞

絕塞程方遠窮陰歲欲殘石城歸夢斷隴月照人
寒

水遠沈來信山長疊去愁夜深關月白休凭驛邊
樓

夙駕巡邊徼歸程隔亂山長安花木麗春苑待君

還

春晝偶書

白晝偶成芳草夢起來幽興有誰知
風簾不動黃鸝語坐見庭花日影移

秋夜懷歸

渭水苔磯阻舊遊夢回空館却凝愁
一聲江笛巴雲暝半夜山風楚樹秋
星落古池孤影動燈搖踈壁冷光幽
遲明不寐空搔首蹤跡何由得狎鷗

憶洛陽

金谷春來柳自黃曉烟晴日映宮牆
不堪花下聽

歌處却向長安憶洛陽

古歌云金谷園中柳春來似舞腰那堪風景好獨上

洛陽橋

長安春望感懷

灞岸春波遠秦川暮雨微
凭高正愁絕烟樹更斜

暉

春晝

午晝花陰靜春風數蝶飛
坐來生遠思深院燕初歸

岐下秋書

碧樹微涼露氣清
感愁懷舊獨含情
西樓月夜明如水
只欠桓伊一笛聲

憶岐下小池

長憶西園清夜景
酒闌無不獨臨池
可憐麗月三更白
誰見紅蕖露滴時

岐下西園秋日書事

務簡羣吏散披襟
幽興長松筠經晚
節蘭菊有清香
水淨澄秋色山高
見夕陽身閒心自
泰何必濯

滄浪

秋懷

輕雲不動日微陰
高樹無風秋色深
獨聽暮蟬臨水坐
十年林壑阻歸心

秋

自古名高衆毀歸
只應身退是知機
林風驚斷西窗夢
一夜秋聲憶翠微

冬日北齋

寒風颯颯響庭槐
愛日明窓坐北齋
閑憶故山歸

未得舊遊時展認雲崖

秋齋

霽景有誰同遠望秋懷無柰只悲歌雲收遠嶠凝
嵐翠雨歇空庭敗葉多

洛陽有懷岐山舊遊

綠鬢年來已漸彫舊遊芳草路迢迢山橫遠翠凝
歌黛柳拂輕梢認舞腰秦甸夢回空有恨洛城吟
斷獨無膠斜陽更上高樓望始覺離情一倍饒

憶岐下舊遊

二年岐下假諸侯事簡民安選勝遊花寺水村時
駐馬莫天秋雪獨登樓靜眠鈴閣聞羌笛閑酌松
醪引越甌別後幾回空有恨葉飛蟬噪動離愁

無題

金甲珠襦鏤繡扃杜城殘月葬娥英春風候館花
如雪空有鶯傳度曲聲

秋日登後樓

遠山重疊故關遙公退乘閑上麗譙今日登臨秋
思苦雨荷風葉共蕭蕭

早春

星紀周天運微陽氣候新
郊原初度臘梅柳暗驚
春故國無書久孤峰入夢頻
年加自多感况復送
歸人

南陽夏日

綠楊陰密覆回廊深院簾垂晝景長
人靜獨聞幽鳥語風來時有異花香
世間寵辱皆嘗遍身外聲名豈足量
閑讀南華真味理片心惟有許蒙莊
夏日有懷

庭樹陰陰夏景遲
閑房愁對暮簾垂
因思往歲陪天仗
正是瑤池賜宴時

途中作

秋末楚雲端行侵苔蘚斑
愁腸不厭酒病眼豈逢
山遠路有時到宦遊無處
閑却思清渭北烟柳掩
柴關

喜吉上人至

喜師來訪我幽會興何長
清論都無倦鄉愁頓欲
忘踈林秋色莫虛閣水風涼
久坐慵言別微陽下

短牆

書黃山館壁

殘日住孤館遲遲行古臺大河連楚去白鳥背城
來離恨渾如結鄉心漸欲灰山花半寥落猶在社
前開

巴東驛秋日晚望

楚驛獨閑望山村秋莫天數峯橫夕照一笛起江
船遣恨須言命冥心漸學禪遲遲未回首深谷暗
寒烟

掩卷

掩卷頻秋望無人共展眉殘陽留古樹白鳥下寒
池簪組心還倦風騷志未衰登臨一長嘆還失渭

川期

巴東書事

鄉思終日有孤淡厭琴樽衆木侵山徑寒江逼縣
門浪沈灘見脊雨過壁生痕懽悴悲蘭蕙因思楚
屈原

池上秋書

虛齋獨語復書空
閑對林塘思少同
霜葉聲乾飄夕照
露荷香冷泣秋風
時平偶作青衫吏
心老渾如白髮翁
昨夜渭川歸好夢
一舸烟雨打孤篷

書懷寄郝監軍

索居終日學忘機
深嘆高堂養獨遲
自問江村紆墨綬
何當烟浦坐漁磯
夢迴渭水秦雲斷
望盡巴山蜀魄飛
好怪多才郝夫子
道孤俱未及輕肥

南平驛

心隨流水還鄉國
身向青山上屈盤
秋夢不成秋

雨細西風一夜客
亭寒

悶書

秋憶故鄉魂欲斷
晚臨寒浦思如流
歸來古屋寒燈暗
能較騷人幾處愁

秋寄江上吟僧

掛錫在荆楚
杜門無往還
潮聲到孤寺
月色遍前山
一雁驚幽思
西風慘病顏
何當重携手
高步白雲間

江上晚望

寒鐘來極浦古寺隔重巖斜日堵願坐天涯落月
帆

金陵懷古

極目望吳甸楚烟凝亂流夜來榆塞雁叫斷石城
秋舊苑荒餘草平川半古丘遲遲獨回首落日一
蟬幽

暮春感事

春至又春暮暮閒心成古心花光隨雨薄草色共烟
深粉蝶稀狂影黃鸝送好音餘芳留不得還共夕

陽沈

秋興

窮秋九月西風高疎林木落聲蕭騷出門長望無
所適唯見空江生暮濤

春日閑望有感

水鄉春氣變新正風物光榮異帝城閑步偶尋芳
草色空林獨聽楚鶯聲烟霞未得從幽興吟賞潛
悲減舊情燕麥楊花自搖蕩不知離客困南征

江上聞鷓鴣

水村烟樹與雲平
閑倚孤舟念遠行
無奈鄉心倍
寥落殘陽中有鷓鴣聲

醉題

榴花滿筯撥寒醅
痛飲能令百恨開
大抵天真有
高趣騰騰湏入醉鄉來

和趙監丞春江送別

孤舟東去水烟微
又客那堪更送歸
三月江頭春
盡日片帆輕絮共紛飛

送李生二絕句

愛君白髮無羈束
命駕常為千里遊
一夜春江又
回棹當時風雨滿汀洲
晴色半和行色遠
江頭別來欲何之
數盃酒盡又
南去正是落花春
暮時

與詩友會宿

此夕南軒宿論詩
萬慮忘苦吟
秋信近
寂坐漏聲
長室靜
燈光暗
桐疎露氣涼
幽懷聊自遣
山色漸
蒼蒼

南冠亭秋晚閑望

南冠亭外淡江天，又客登臨更浩然。遠浦秋深翻
白浪，孤山日暮起蒼烟。已嗟異國逢衰節，况復西
風聽亂蟬。倦鳥知還，雖有意，故林無奈隔秦川。

峽中春感

二年窮峽外，不見帝城春。覽照知年老，逢花感恨
頻。浮榮何足貴，幽別轉難伸。終憶歸清渭，林泉卜
舊鄰。

東歸再經峽口

復命經三峽，波瀾極目愁。片雲生斷壁，孤石礙中

流。道路連巴塞，風烟接楚丘。重來登望處，因念昔
年遊。

江上晚行

秦川不得却歸耕，奉詔年來在楚城。孤寺殘鐘催
夕照，汀洲疎葦送秋聲。西風獨起湖山思，夕客應
知寂寞情。莖鶴慚無鷺，弋意對人孤立水烟平。

初秋即事

古邑端居夏景移，炎飈經雨自收威。蓮衰小渚秋
光淡，蟬噪平林夕照微。冷句每招江客和，深心終

約嶽雲歸晚涼却近南亭立獨看沙鷗向浦飛
蓮

數柄踈荷出小池幽香深謝好風吹曉來秋氣凝
清露似學湘妃怨九嶷

望都雨夜

孤驛蕭條風雨夜夜聲窻竹動秋聲離魂無睡難
成夢却遠長廊獨自行

成安秋望

八月西風蟬噪時蕭蕭踈葉已辭枝烟村物景都
無賴况是登臨有所思

夏日晚涼

微涼天氣似秋期風觸踈簾影自移遠夢有時尋
水寺孤吟終日對莎池笋梢成翠堆輕籜梅實翻
黃壓嫩枝兀兀騰騰聊自遣此懷深謝老僧知

輦下書懷

身名長似夢家計盡蕭然旅宦遊梁苑歸心滿渭
川郊原秋變色桑柘晚生烟願得長閑去何妨老
一廛

冬日偶書

戶庭初過雪鳥雀亦聲稀
天淡雲容結林寒日影微
虛名何足道前是旋成非
簪紱全忘念終須掃澗扉

巴東縣齋秋書

訟庭終日靜琴鶴亦長閑
晚樹生涼吹秋思在遠山
水穿吟閣過苔遠邛床斑
幸有江雲看何須卜往還

江行書事

孤掉泔流岸凝懷似舊遊
朝雲生嶽頂斜月動江流
賤節難于世離心易感秋
因思六朝事千古有遺愁

月夜懷杜陵友生

一忝輶車命三逢水國春
重看漢浦月獨憶杜陵人
宦違前計歸田失舊隣
年來更多緒清淚滿衣巾

贈僧

重城須久住塵事日全無
落葉驚秋信思山展舊

圖貌同仙鶴瘦心似片雲孤念我浮名在還將靜者殊

楚江有弔

悲風颯颯起長洲獨弔靈均恨莫收深岸自隨浮世變遺魂不逐大江流霜淒極浦幽蘭莫暮波動寒沙宿雁愁月落烟沈無處泊數聲猿叫楚山秋

秋雨懷友生

江城秋雨歇孤坐役吟身草色荒三逕虫聲滿四隣邊鴻來已近庭葉落還頻對此空搔首無由面

故人

南亭

初夜南亭望清吟露濕衣雨餘羣籟發天淡數星稀秋氣又還至故園猶未歸虛堂愁重入燭白冷光微

贈惠政上人

惠政成安人也此詩碑在成安縣公祠西壁

寥寥長日掩松關白首忘機古寺閒香燼石房終曉講葉堆莎徑憶秋山澄泉心地清無染埜鶴精神老更閑孤坐有誰同此意白雲空見渚禽還

輦下春望

獨向東門凝日望園林無處不啼鶯鄉心已似揚
花亂歸路那堪莖草生紫陌盡應趨勝地紅塵誰
肯受文閑名年來却羨滄江叟長在湖山聽浪聲

題楊氏別墅

門巷枕江濱疑將俗境分湖山晴後見天籟靜中
聞徑僻苔空老林寒日漸曛高懷無一事長歲似
孤雲

再到鄴下有感

漳濱勝地皆牢落晚歲重來恨莫收極浦寺藏雲
樹老故人門鏤雨苔秋烟霄得路輸時彥泉石忘
機阻舊遊今日重思昔年事放懷惟上夕陽樓

成安秋望有懷

年加心地轉如灰書篋經旬亦懶開詩句偶吟皆
感事文章無用獨傷才秋蟬殘韻搖疎樹夕照寒
光下古臺閑遠岸莎看埜水暗流紅葉不重回

書懷寄唐工部

不才曾忝吾君選紫殿科名志已酬孤立敢言逾

素分高吟深愧預清流西風獨見江籬莫紅葉還
思苑樹秋多謝明公知賤節每貽清句緩牢愁

鄴中和崔邁著作

虛室凝愁厭夜眠長吟靜對欲涼天夢回故國人
空遠望斷重城月自圓時泰未能拋組綬性孤終
是憶林泉明朝奉詔遊方去何處烟江寄客軀

獨倚空樓畏景殘凝眸魂斷楚雲端猿聲清一作好

雜江聲聽山色遠一作宜和霽色看鳥掠平蕪堪入

畫風來危檻欲生寒蕭蕭前浦歸帆靜落日長吟

且凭欄

漢上偶書

謫仙唐室遊茲郡花下聽歌醉眼迷今日漢江烟

樹靜更無人唱白銅鞮李白常有歌云落日欲沒

鹿門小兒齊拍手
欄街爭唱白銅鞮峴山西遊客醉歸花下迷

春陵聞雁

蕭蕭疎葉下長亭雲淡秋空一雁經惟有北人偏
悵望孤城獨上倚樓聽

又

危欄秋盡偶來凭
霜落秋山爽氣澄
誰道衡陽無雁過
數聲殘日下春陵
衡州有回雁峯云
雁止於衡陽不得

贈魏野處士

人間名利走塵埃
惟子高閑晦盛才
歌枕夜風喧薜荔
閉門春雨長莓苔
詩題遠岫經年得
僧戀幽軒繼日來
却恐明君徵隱逸
溪雲誰得共徘徊

寇忠愍公詩集卷中

寇忠愍公詩集卷下

荆南秋望

西風吹戶牖
猶自客荆蠻
積水浮秋漢
微陽淡遠山
蟬稀疎葉盡
雨歇片雲閑
何日忘簪紱
深居石室間

江上送別

浪疊春江遠
樹微落花風
雨共淒淒愁
人此際腸
頭斷况是登
臨更送歸

送人往嶺表

炎光君此去旅恨杳何窮海樹瘴烟黑蠻村山路
中

秋日

柳裏蟬噪寒烟淡淡地迴山遙暮雨收宛是昔年秋
氣味只添多病與離愁

留題洛北羅漢閣

地高閣迥宜閑望望盡雲山首懶回林下埜僧應
笑我半年旌旆四曾來

判都省懷感

昔為學士掌三銓屈指年光三十年秋雨滴堦桐

已老白頭重到倍依然

余頃年手植桐
樹在省有朽者

輦下春日

雨餘宮闕麗春陰三月花光照上林誰倚青樓望
歸騎日斜南陌柳烟深

南宮齋宿靜思陝城東閣竹

南宮向夕景彌清風竹蕭然動遠情憶到陝城東
閣畔拂窓敲砌送寒聲

途次方城

方城舊路四曾過此度偏饒悵望多獨倚客亭思
往事南陽何異夢南柯

經郴州永興驛

昔擁雙旌在斗城今朝孤館語同名天遙秦樹無
因見極目空饒悵望情

臨海驛夏日

嶺外炎蒸當盛暑雨餘新館覺微涼最憐夏木清
陰合時有鶯聲似故鄉

海康西館有懷

風露淒清西館靜悄然懷舊一長嘆海雲銷盡金
波冷半夜無人獨凭欄

長安春日

淡淡秦雲薄似羅灞橋楊柳拂烟波夕陽樓上山
重叠未抵春愁一倍多

病中書

多病將經歲逢迎故不能書惟看藥錄客只待醫
僧壯志銷如雪幽懷冷似冰郡齋風雨後無睡對
寒燈

長安春書

務閑公府都無事
騎吏前驅引馬行
雨霽晚街官柳色
日長春寺講鐘聲
雲山已有終南秀
泉石猶思洛下清
聞道曲江新水滿
欲携歌管出重城

宮詞

長門秋夜雨
窗外滴寒聲
悔不先辭輦
應無別恨生

柳

絲翠最宜經宿雨
絮飛爭忍逐香塵
簾垂獨院無

人處一樹風搖日午春

杜陵

燕有情還至
花無主亂開
杜陵人不見
夜月自徘徊

左馮寺樓閒望

閑思至道年中事
獨倚左馮城外樓
目斷平臯人不見
莫天無際水悠悠

偶書

往事都如夢
流年只斷魂
不堪春盡日
細雨欲黃昏

昏

途次鄧州

南陽西去見遺基
駐馬平郊遠樹微
自笑平生無所着
不如山鳥解思歸

春雨

漠漠霏霏着柳條
輕寒爭信杏花嬌
江南二月如烟細
誰正春愁在麗譙

感舊

長恐密勿侍甘泉
丹地翱翔獨少年
重到文昌倍

惆悵秋風霜鬢共蕭然

途次三絕

秋風故關路
蟬噪日斜時
有客驅征馬
茫茫天一涯

大澤荒草闊
行人心慘悽
邊雲時斷續
流水自東西

沙濶戍樓迥
風高邊日清
遲遲驅足馬
何處問歸程

冬日偶成

正是旅愁悲遠宦况逢邊塞向殘年輪蹄影絕冬
深路鳥雀聲稀雪後天探騎經旬無使客戍樓終
日有烽煙病來無復拈樽酒獨向虛窓盡日眠

九日郡公出遊郊外余方卧郡齋聽水因
寄一絕呈諸官

菊老東籬人病酒西風黃葉滿荒田不知今日登
高興何似虛堂聽水眠

春日偶書

柳岸花塘慵獨賞閉門春盡阻閑遊少年多故心

先老却被人疑似白頭

送溫尚書入洛

蕭蕭紅葉馬前飛又送王孫晝錦歸却到舊遊應
悵望故溪秋蘚滿魚磯

小韓店

昔從鄴下游梁苑孤店曾經十數回歲月暗移人
事改白頭重到小韓來

虛堂

虛堂寂寂草虫鳴欹枕難忘是舊情斜月半軒疎

樹影夜深風露更淒清

憶樊川

閑想舊遊都是夢別來秦樹又西東
高秋最憶樊川景稻穗初黃柿葉紅

東窓

徙倚東窓夜未明悄然幽館獨凝情
燈搖古壁秋蛩怨露下踈林宿鶴驚
道在任從時態薄年加潛覺睡魂輕
待酬北闕君恩了歸聽冰泉落石聲

九日不飲

雲淡長空日欲斜水邊衰柳噪寒鷗
病來不飲空淒感獨遶東籬詠菊花

和人春莫

流年賦分長多感晝日長思立短亭
猶謝海棠花始發似留春色向凋零

又

昔曾過洛浦遺恨寫蒼苔往事詩空在
春深我獨來

蚤行

嚴鐘將報曙遊子已登徒
楚火時明滅殘星似有

無

寇忠愍公詩集卷下終